

REGIONAL NEWS BULLETIN
HEADLINES (EVENING)

Date – 21/02/2025

Time - 18:30 Hrs

1. **Mizoram Legislative Assembly budget session neih mekah, vawiin khan Prime Minister hlui, nikum a thi Dr Manmohan Singh-a sunna hun hman a ni.**
2. **Assembly Budget session-a private members resolution awmchhun tur, 'Mizoram Sorkar-in Lengpui Airport, Indian Air Force kuta hlan emaw hralh tum a, hma a lak mek hi tha ka ti lo va ti tawp rawh se' tih chu sawiho mek a ni.**
3. **Prime Minister Narendra Modia chuan khawvel ram thiltithei zingah India a inlan chhoh zel avangin hruaitu chak leh viak tha mamawh a ni a ti.**
4. **Mipuiten an sum senga damlo an inenkawlna chu kum 10 chhungin zaa 64 atangin zaa 39 ah a tlahniam.**

<><><>

ASSEMBLY BUDGET SESSION

Mizoram Legislative Assembly budget session neih mekah, vawiin khan Prime Minister hlui, nikum a thi Dr Manmohan Singh-a sunna hun hman a ni a, ngawi rengin minute khat chhung an ding.

House Leader Pu Lalduhoma chuan, Dr Manmohan Singh chu politics-ah a zuanluh hma pawhin India ram tan a tha thawh hlawk tak a ni tih a sawi a, ram tan hna pawimawh leh lian tak tak lo chelh tawh a ni a ti a, chung zingah chuan Governor of the Reserve Bank of India pawh a tel, a ti.

Chief Minister Lalduhoma chuan Pu Singh-a chu India economist leh parliamentary ropui tak a ni a ti a. Union Finance Minister a nih lai kum 1991-1996 kha India ram sum leh pai dinhmuna hun khirh tak a tawh lai niin a sawi a, chu hun khirh leh hun thim siam tha tura Liberalisation Budget hmanga huaisen taka hma a lak ngamna chu a chuanawmin India ram bung thar a chuan kai lehna a nih bakah, khawvelin Economist ropui tia an hriatna a ni ta niin a sawi.

Leader of Oppostion Lalchhandama Ralte pawhin, India ram Economy tluchhia siamtha tura India in a chhuanvawr leh a neih that a ni a ti a, India fa chhuanawm, mipui tam si economy chak lo taka awm pawh a khawhawi thak a, hmasawna thlentua a ni, a ti.

Siaha bialtu MLA Dr K. Beichhua leh Lawngtlai West bialtu MLA Pu C. Ngunlianchunga te pawhin a uina thu sawiin, Pu C. Ngunlianchunga chuan Pu Singh-a chu thusawi thiam a nih vanga hriat hlawn a ni lo a, hnathawk thiam mi a nihna chu khawvelin a hriat dan a ni, tiin a sawi bawk.

<><><>

AKASHVANI GEN ASSEMBLY

Akashvani Mizoram chhunga thawkte intawhkhawmna General Assembly chu vawiin khan “Radio for Social Change” tih thupui hmangin hman a ni. Vawiina Aizawl Chawnpuia Transmitter a hun hmanah hian Akashvani Director leh Mizoram Cluster Head Pu DR Lalropuia chuan khawvel nunphung inthlak zelah Radio pawhin hma a sawn zel a ti a, tun thlengin ngaih pawimawh ala hlawn reng tih sawiin Radio chu mipui nunphung a tha zawnga thlak danglam kawngah nasa takin tha a thawh tih a sawi. Director chuan tunlai social media khawvelah Radio mipuiin rintlakah an ngaih avangin thawktute theihtawp chhuah a pawimawh a ti a, tunlai khawvela midang ngaihsakna tlem tawh na ah Radio chu lungngai hnemtu, mihring pui te ngaihtuahtu, hnemtu leh awm tleitu an nih avangin thawktute nasa taka tan la zel turin a sawm a ni. Vawiina hun hmanah hian Akashvani Mizorama palai hmun hrang hrang atangin an kal khawm a, Akashvani Mizoram Staff Welfare Association ah hian tun dinhmuna member 270 an awm mek a ni.

<><><>

PVT MEMBER RESOLUTION

Vawiin Assembly Budget session-ah Tuirial bialtu MLA Pu K.Laldawngliana chuan Private Member resolution a pulut a, a bill 'Mizoram Sorkar-in Lengpui Airport, Indian Air Force kuta hlan emaw hralh tum a, hma a lak mek hi tha ka ti lo va ti tawp rawh se' tih chu sawiho mek a ni.

Mizoram Assembly session-ah hian Private Member resolution hi Zirtawpni apianga lak thin a ni a, tun tumah hian session chhungin Zirtawpni dang a awm dawn loh avangin vawiina Tuirial bialtu MLA Pu K.Laldawgliana resolution putluh hi tun session bikah chuan private member resolution awm chhun a ni dawn a ni. Vawiin session ah hian Governor thusawi chung a lawmthu sawina motion chu member ten lungual takin an pass a ni.

<><><>

P&E

Power & Electric Department Minister Pu F Rodingliana’n Mizoram sorkarin a hun taka kawlphehtha hman man a pek avangin rebate nuai 108, sing 7, sang 8 a dawng tih a sawi.

He thu hi vawiina Mizoram sorkarin sorkar laipui scheme, PM-Surya Ghar : Mufti Biji Yojana hnuai a state subsidy a pek chhuahnaah a sawi a, Minister chuan kum 2022 leh 2023 inkarah khan Mizoram sorkarin kawlphehtha hman man a pek tlai avangin surcharge cheng vbc 5 leh nuai 13 a chawi a, nikumah erawh chuan Mizoram sorkarin a hun taka kawlphehtha hman man a pek avangin rebate nuai 108, sing 7, sang 8 a dawng ta thung a ti a. Hei bakah hian P&E Minister chuan kawlphehtha chu thim zing hle in lang mahse kum 2023 leh 2024 ai khan darkar 700 chuangin a thim zing lo zawk a, mipuite pawhin kawlphehtha an dawn that chuan pawisa chawi a tam zawk dawn tih an hriat ve tul a tih thu a sawi bawk a ni.

PMSG:MBY hi sorkar laipuiin ram mipui a duh apiang ten an chenna inchunga nizung hmanga kawlphehtha siamchhuah, Rooftop Solar System an bun theihna tura tanpuina a duan a ni a, vawiin khan Mizoram sorkar chuan a tum khatna atan central subsidy pek tawh mi 75 te hnenah state additional subsidy a pe chhuak a, sum semchhuah zat chu cheng nuai 29, sing 8, sang 4 a ni. Mizoram sorkar chuan Mizorama kawlphehtha hmang thintute thla tin electric bill a lo tlakhniam theih nan PMSG:MBY hnuai a sorkar laipui leh state sorkar subsidy hmang tangkaia Rooftop Solar System bun theuh turin mipuite a ngen a ni.

<><><>

WATER BILL

Public Health Engineering Department Minister, Prof. Lalnilawma chuan, tundinhmunah Mizoramah tui bill tihsan tumna a awm rih lo a ti.

He thu hi vawiina Assembly thutkhawma zawhna leh chhanna hunah sawiin, Minister chuan a kaihhruai Department chuan vawi khatmah tui bill tihsan chungchang an la sawi lo tih a sawi a, hetihlai hian VC inthlan dawna tui a hnianghnar theih nana theihtawp an chhuah hnuah tui a haw that avangin metre a sang a, department lamin mipuite hnenah tui an dawn tam avangin tui bill a sang dawn tih an hriattirna chu media thenkhatin sorkarin tui bill tihsan a tum tiin an vawrh darh niin a sawi a, Mizoramah tui bill tihsan tumna a awm rih lo tih a sawi a ni.

PHE minister hian nikum aiin kuminah Aizawl tui tlan Tlawng luiah tui a tlem tih sawiin, tui tlem laia Aizawl khawpuiin tuia harsatna a tawh loh na turin Mizoram sorkar chuan hma a la mek tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

RANDOM EXAM

Vawiin khan Mizoram chhunga district 9-a school thlan bikahte Pawl 3 leh Pawl 6 Random examination buatsaih a ni a. Primary school 217 leh Middle School 107 atangin zirlai naupang 2950 chuangte chuan exam hi an hmachhawn a ni. Random Examination-ah hian Naupangte chu common question chhantir niin, exam hi OMR sheet hmang vek a buatsaih a ni a. Hei hi National Education Policy (NEP) 2020-ina a tum tihhlawhtlinna atana rahbi thar pakhat niin, Zirlaibuin zirchhuahpui a tum Learning Outcomes te naupangte chu a zirchhuahtir em tih hriatna atan a pawimawh hle tur a ngaih a ni. Vawiina zirlai naupang exam hmachhawnte tan hian SCERT chuan Pawl 3 leh Pawl 6 Completion Certificate a pe dawn a. Exam kalpui dan tur inzirtirna hun chu ni 18 khan SCERT hnuai a neih a lo ni tawh a ni.

PM ON SOUL

Prime Minister Narendra Modia chuan khawvel ram thiltithei zingah India a inlan chhoh zel avangin hruaitu chak leh viak tha mamawh a ni a ti. Vawiina School of Ultimate Leadership (SOUL) Conclave, Bharat Mandapam, New Delhi-a a hawnnaah he thu hi sawiin Pu Modia chuan khawvel huapa hruaitu tha kalphung entawn tlak hnutchhiah thei leh khawvel harsatna chingfel thei tur khawpa mi chak ram hruaitu neih a tul a ti.

Pu Modia chuan Khawvel ramdang tluk pha sawrkar inrelbawlina leh policy tha neih a tul thu sawiin khawvel hmundang amite nen pawh inpawh a ngai a ti a. SOUL ten hruaitu tha tak tak an chherchhuak thin chu lawmawm atih thu sawiin mihring inchher chu ram hmasawwna atana pawimawh ber a ni a ti a. Viksit Bharat ti hlawhtling turin mitinin rim takin an thawk a ti a, Ngaihtuahna leh thiamthil ti hmasawn thei tur sum leh pai leh hmanraw dangte mamawhna a sang a ti a. SOUL te chuan hruaitu tha ramchhung leh pawn huap pawha mi tha an chher chhuah zel a beisei thu a sawi bawk a ni.

<><><>

UNION HEALTH MINISTER

Mipuiten an sum senga damlo an inenkawlina chu kum 10 chhungin zaa 64 atangin zaa 39 ah a tlahniam. Vawiina International Health Dialogue 2025, New Delhi-a neihah Union Health Minsiter JP Nadda chuan he thu hi sawiin Pradhan Mantri Jan Arogya Yojana leh National Health Mission bakah scheme dangte avangin mipuiten damlo enkawlina atana an sum sen hi a tlahniam a ti a. Kum 2018 ah Ayushman Bharat Pradhan Mantri Jan Arogya Yojana chu hman tan anih thu sawiin ramchhung mipui zaa 40 vel chu he scheme hian a huam tawh a ti a. Tunhnai maiah khan mi tupawh kum 70 chunglamte chu mi hausa emaw rethei emaw pawh nise he scheme ah hian ziahluh vek an nih thu a sawi bawk a ni.

<><><>

FBI

US President Donald Trump-a hnungzuitu rinawm Kash Patel chu Federal Bureau of Investigation (FBI) Director pakuana atan ruat a ni. FBI hi America-a dan leh thupek kengkawhtu thuneitu sang ber a ni a. Nizan khan Senate chuan Pu Patel-a ruatna hi a pawm a ni. Social Media-ah Kash Patela chuan President Trump leh Attorney General Bondi te chungah an thlawpna avangin lawmthu a sawi a. Mipuite thinlungah FBI chung a rinna a ngheh chhoh leh theih nan leh polictics hmanga judicial system thununna pawh tihtawp a intiam a ni. Kash Patel hi kum 10 chhung FBI Director a ni dawn a ni.

<><><>